

D. D.

DISSERTATIO ACADEMICA,

SISTENS

EXAMEN QUÆSTIONIS, DE PHILOTA,
PARMENIONIS FILIO,
HABITÆ,

QUAM

ANNUENT. AMPLISS. FAC. PHIL. ABOËNS.
PUBLICO EXAMINI SUBJICIUNT

LAURENTIUS WADELL,
PHIL. MAG.

ET

ISAACUS WADELL,
STIPEND. REG., SMOLANDI.

IN AUDIT. MIN. die XIV. MAIJI A.R. S. MDCCXCIV.

Horis A. M. Solitis.

ABOÆ,

Typis FRENCKELLIANIS.

73.

KONUNGENS
TRO-MÅN, GENERAL MAJORN

och

LANDSHÖFNINGEN, öfver ÅBO- och BJÖRNEBORGS-
LÄN, samt ÅLAND,

HÖGVÄLBORNE HERRN

*Herr ERNST GUSTAF
von WILLEBRAND,*

Tillägnas desfa blad i alldradjupaste ödmjukhet
af

HÖGVÄLBORNE HERR GENERAL MAJORENS
och LANDSHÖFNINGENS

Aller-ödmjukaste Tjenare,
ISAK WADELL.



S. I.

Macedonum Regis ALEXANDRI, cui titulum MAGNI quondam addidit adulatorum cohors, vitam considerantes, præsertim ab eo tempore, quo Philippum designatus Patrem, Jovis Hammonis filius salutari voluit, multa quidem fortitudinis, plura tamen temeritatis, pauca prudentiæ, & nulla fere generosi animi in ipso deprehendimus specimina. Flagellum generis humani haud immerito dixeris hunc Principem, qui, sicut gentes tam cognitas, quam ignotas bello lacescivit, ut vanam consequeretur gloriam; ita etjam cives suos, immo amicos intimæ admissionis, sub induciis & in festivis solemnitatibus ferocitati suæ atque ambitioni, præter fas & æquum, horrendum in modum sæpe immolavit. Quemadmodum enim secundæ fortunæ, quæ cuncta ipsius molimina comitabantur, aura elatus, Divinos sibi poscebat honores; ita ex vanitatis suæ culmine illos maxime persequebatur, quos vel suspicabatur, malesanam hanc arrogan-

tiam ægris latuſos animis. Id quod inter alios, ad suam usque internacionem experta fuit inclyta PARMENTONIS familia. De supremo hocce exercitus Macedonici Duce tale testimonium, quod in præclaris, quæ in antecedentibus recensuerat, ejus facinoribus est fundatum, adfert CURTIUS, postquam nefariam ejus necem exposuiset: *Hic exitus Parmenionis fuit, militiæ domique clari viri. Multa sine Rege prospere, Rex sine illo nihil magnæ rei gesserat. Felicissimo Regi, & omnia ad fortunæ suæ exigenti modum satisfecit. LXX natus annos, juventis, ducis & sapientiam gregarii militis, munia explevit: acer consilio, manu strenuus, carus Principibus, vulgo militum acceptior (a).* Taceo alia, quæ in Parmentionem cumulat elogia Curtius, quæ singula eo collineant, ut ostendant, ipsum fuisse in Regem præcipua fide, optimeque de eo meritum. Patrem in bellum Persicum comitabantur tres egregii filii, quorum minimus natu PHILOTAS, Regi inter ceteros amicos carissimus, adeo ut omnium etiam arcanaorum ipsum constitueret arbitrum, & equitatu Macedonico, optimæ exercitus parti, ac Principibus nobilissimæ juventutis ipsum unum præficaret Alexander, salutem, spem ac victoriam suam fidei ejus tutelaque commitens; quemadmodum Rex ipse apud Curtium (b) fastetur. Quo quidem familiaritatis fastigio nec indignus erat Philotas, qui vicissim ita se gesit, ut suo merito gratiam Regis sui diu retineret, adeo ut ne
qui-

¶ 5 ¶

quidem in invidiam Regis nimium suspicacis per longum satis temporis intervallum incideret.

(a) Vid. *Histor. Libr. VII. C. 2. §. 33.*

(b) Vid. *Libr. VI. C. 9. §. 21.*

§. II.

Enimvero quam levi momento humana quævis mutentur, & quam exiguum nonanunquam sit intervallum inter summum honorem & exquisitissimum cruciatum, vel suo exemplo satis comprobat modo nominatus Philotas. Seilicet Dymnus quidam, modicæ apud Regem Alexandrum auctoritatis & gratiæ, flagrabat, pudet dicere, amore exoleti, cui Nicomacho erat nomen, & ut eundem sibi eo magis deviniret, ipsi, cuius fidem sibi per sanctissimum jusjurandum obstrinxerat, aperuit, insidias Regi in tertium inde diem esse comparatas, hujusque consilii participes esse illustres Viros, Demetrium, corporis Regis custodem, Peucolaum, Nicanorem, Aphoebetum, Lœcum, Dioxenum, Archeopolim & Amyntam. Hæc Nicomachus, qui fidei in parricidio datam haud servandam esse, recte existimavit; actus enim per se vitiatus non accipit vim per accedens jusjurandum, refert fratri Cebalino, qui talia molimina protinus Philotæ aperit, rogitans, ut ipse Regem salutis suæ in ancipiæ hocce rerum articulo admonereret. Mox igitur ad Regem, a quo digresus fuerat, revertitur

Philotas; sed multo invicem de aliis rebus consumto sermone, nihil eorum, quæ a Cebalino cognoverat, nuntiat. Postera die iterum Philotam, Regis tentorium introitârum, insidiarum, quæ parari dicebantur, admonet Cebalinus; sed ne tum quidem munus sibi commissum exsequitur hic Regis amicus. Cum itaque Philotas hoc modo in suspicionem Cebalini venisset, hic nobili Juveni, cui Metron nomen erat, quantum scelus moliebatur, aperit, qui protinus Regi, quæ ab indice acceperat, ostendit. Quæstione habita, Rex cognovit, conspiracyem ante biduum fuisse Philotæ a Cebalino detectam, quod nec ipse diffitebatur; sed cum fidem non haberet scorti sermoni, timeretque, ne jurgium inter amatorem & exoletum non sine aliorum risu Regi exponeret, noluit inficeta adeo narratione hilaria Optimi Regis turbare. Complexus deinde Regem orare cœpit, ut præteritam vitam potius, quam culpam, silentii quidem, non facti ullius, intueretur. Quibus Rex, ut videbatur, commotus, supplici Philotæ dextram in pignus reconciliatæ gratiæ dedit, dicens, *Contemptum magis, quam celatum indicium esse, sibi videri, uti habet CURTIUS Hist. Libr. VI. Cap. 7.*

§. III.

His autem nondum peracta fuit scena. Quamvis enim Philotas in gratiam Alexandri rediisse videatur,

retur, & extra periculi aleam positus, Rex tamen, quem vel suæ suspicionis exagitabant furiæ vel inimicorum Philotæ machinationes exasperabant, inscio Philota, consilium amicorum paulo post convocavit. Horum plerique & Parmenionem & Philotam tam propter auctoritatem, qua in exercitu gaudebant, quam propter gratiam, qua uterque apud Regem vallebat, internecino odio persequebantur, ideoque de occasione, utrumque opprimendi diu quæsita & tandem oblata, sibi in sinu gratulabantur. Cebalinum deinceps intromissum Rex, quæ de conspiratione & Philota cognoverat, exponere jubet; quo facto, consiliarii convocati, sanguinemque sitientes, Philotam nondum auditum, non solum reum agunt, sed etjam conjurationis ipsum vel auctorem vel saltem partipem habent, unanimes igitur decernunt, quæstionem de ipso habendam esse, ut tanti sceleris socios indicare cogeretur. Atque ut isthæc molimina tanto magis celarentur, Rex Philotam ad ultimas & ferales omnino epulas admisit, & non cœnare modo, sed etjam familiariter colloqui cum eo, quem damnaverat, sustinuit. Sed blande a se dimisum, domi tranquille decubentem, & alto sopore oppressum, noctu comprehensum, catenis injectis vincatum & obsoleto amiculo velatum probe servari Rex jusfit. Dymnus, voluntaria morte fata sua præoccupaverat, ceteri, qui supererant, indices alios conspirationis socios nominabant, nemo autem conjuratorum Philotam egit reum.

§. IV.

Quamvis autem Alexander ingenti in Macedonas gauderet potestate, ex tenore tamen legum Patriæ suæ fundamentalium neminem pro arbitrio condemnare potuit; de capitalibus enim rebus ex vetusto Macedonum jure inquirebat exercitus tempore belli; sicut in pace res majoris momenti ad populum deferabantur. Nihil enim valebat potestas Regum, nisi postulatis eorum auctoritatem addidissent exercitus aut populi suffragia. Cum igitur Philotam e medio sublatum anxie cuperet Alexander, omnibus, quæ exegitare sagacitas sua potuit, artificiis utebatur, ad iracundiam militum in ipsum concitandam. Convocata enim militum concione, primum in medium proferri jusst confossum Dymni corpus; ipse aliquandiū attonito stupentique similis stetit, tum graviter ingemiscit & deinde veluti horrore victus, strictim indicat, se structis sibi insidiis pœne e medio sublatum fuisse: postea autores tanti facinoris nominat Parmenionem & Philotam, qui alios sibi ejusdem conspirationis socios adsumferant, inter quos fuit etiam Dymnus, cujus exanime corpus adspicerent, qui captus & ad Regem deducendus violentas sibi ipsi intulerat manus, ne quæstiōni, sicut meruerat, subjiceretur. Momenta accusationis hæc fuerunt præcipua: Quod Philotas non detexerit Regi insidias, quas inimici meditabantur, quamvis Cebalinus easdem tempestiye indicasset & iterata vice rogasset, ut Regem face-

* 9 *

faceret omnium certiorem: Quod Dymni spontanea
mors indicaret, metum non fuisse vanum: Quod Philo-
tas, gratia Regis ad summos honores proiectus,
altiora spiraret & regnum Macedoniæ affectaret, sciens
Alexandri orbitatem: Quod Parmenio hujus parrici-
dii esset particeps, probat ex intercepta ejus ad Fi-
lios epistola, cuius summa hæc erat: *Primum vestri
curam agite, deinde vestrorum, sic enim quo destinavi-
mus, efficiemus.* Denique commemorat, Philotam o-
lim coluisse amicitiam cum hominibus sibi inimicissi-
mis, quos nominat, nec æquo animo tulisse Divinos,
quos obtinuisset, honores, sed rescripsisse: *Se quidem
Regi gratulari, quod in Deorum numerum esset receptus,
ceterum misereri eorum, quibus vivendum esset sub eo,
qui modum hominis excederet.* Tandem Rex com-
memorat ingentia beneficia tam in Parmenionem, quam
in Philotam a se collata, atque Philotam provocat,
ut se defendat, statim vero ipsum graviter increpat,
quod non Macedonica lingua, sed alia, ea scilicet, qua
in ipso accusando usus fuerat Alexander, suam pro-
ferret defensionem.

§. V.

A summo honorum fastigio ad insimum humanæ
fortis fastidium intra paucas admodum horas dejectus
Philotas, in tristissimo hocce vitæ articulo nec sibi
tamen, nec causæ suæ defuit, sed ad præcipua accu-
sationis momenta ita respondit, ut eadem diluisse vi-

B

dere.

deretur. Primo provocat ad eosdem testes, quos in concionem produxerat Rex, quorum nemo Philotam vel ut sceleris consortem, nedum ut conspirationis auctorem nominaverat, immo quamvis equuleo impositi fuisse, ut veritas a consciis extorqueretur, ne ullus tamen Philotam accusavit, quamvis nemo parcat morituro, nec cuiquam moriturus. Nec Cebalinus arcanum hujus conjurationis fidei Philotæ committere potuisset, si frater illius Nicomachus ipsum in conjuratorum numerum retulisset. Remanet tamen adhuc serupulus, quare Philotas intentatum flagitium statim, ubi illud rescivit, non detexerit. Haud difficitur Philotas, negligenter hoc a se factum fuisse, sed simul asserit, Regem sibi supplici hanc socordiam mox condonasfe, dextram suam in pignus reconciliatae gratiae dedisse, atque convivio familiariter excepisse. Nescit igitur, quamobrem jam accusetur, an propter priorem negligentiam, cuius veniam dudum obtinuisse, vel propter aliud novum facinus? Si hoc, querit, quid demum proxima nocte, postquam a Regis mensa digressus fuerat, patrasfet, quod animum ejus mutare potuisset? Si objectæ conspirationis vulnus in præcordiis Regis sui interea recruduisset, uon disimulat, nova sibi in sui defensionem esse argumenta, quibus non solum innocentiam suam probare, sed suspicionem etjam a se amoliri posset. Erat enim, dum comprehendebatur, alto sopore oppressus, tam sua innocentia, quam Regis dextra securus, dum mali cujus-

cujusdam sibi consciis semper obstrepat conscientia, nec dormire eos sinat. Præterea si objectæ conspirationis auctor vel socius fuisset, statim præoccupasset omnes indices, ne ipse præveniretur. Cebalinum igitur confestim e medio tollendum curasest, quod facilimum, nec in ultimo vitæ periculo constitutus Regi pepercisset, dum solus cubiculum hujus intrasest, ferro cinctus. Adhæc ex toto exercitu aliquem provocat, qui testari posset, quod muneribus, studiis aut promissis ipsum sibi devincire annis fuerit, qualis eorum est mos, qui altiora spirant. Posthæc duplum adfert causam, quare facinus ad se delatum Regi e vestigio non detexerit, tum quod levius admodum esset index, cui tanto minus crederet Alexander, quod nec fidem habuisset Patri Parmenioni, admodum roganti, ut a Philippo Medico sibi caveret, nec sibi, cum, quæ audierat, detulisset, sed cum ludibrio credulitatis fuisse repulsum; tum quod, si ex indicio Cebalini quosdam nominasest, quos plene convincere non posset, procul dubio fuisset accusatus, quod innocentes cives opprimere studeret. Quid igitur faceret, invisus dum indicat, suspectus dum tacet? Cetera accusationis momenta pari facilitate diluit Philotas, dicens: se uti lingua communi, tum quod nativus sermo commercio cum aliis gentibus exolevisset, tum ut ab illis intelligeretur, qui de ipso judicium ferrent: Scelera amicorum, jam pridem suppliciis adfectorum, sibi innocentis nec eorundem socio, salva æquitate, objici &

imputari non posse: De impetrata apotieosi quid sen-
tiret, ex jure familiaritatis Regi libere scripsisse, non
de Rege, id quod non ex invidia factum, sed quod im-
pense pro Rege timeret, dignorem sibi Alexandrum
visum, qui Jovis stirpem tacitus agnosceret, quam qui
prædicatione jactaret. Quantumvis igitur magna es-
set Alexandri in exercitum auctoritas, magis tamen
hic, ut videtur, commotus fuit mascula Philotæ de-
fensione, quam Regis accusatione; quare nisi ferox
quidam Dux novis convitiis bilem exercitus, qui ful-
mina irati Regis extimescebat, contra Philotam denuo
exasperasset, incertum est, quem exitum habuisset
hæc tragœdia. Philotas igitur nullius sceleris con-
victus, equuleo fuit impositus, in quo, cum quæstioni
præcessent acerbissimi illius inimici, exquisitissimos o-
mnis generis cruciatus diu sustinuit, suam testans in-
nocentiam; ad postremum autem exhaustus verberum
ac dolorum, qui humanam omnino superabant constantiam,
acerbitate, flagitium, cuius accusabatur, in
se & in Patrem configit, quo facto, ipse atque ceteri
a Nicomacho nominati ab exercitu lapidibus obruuntur.

§. VI.

Atque hæc ipsa sunt criminis illius momenta;
propter quæ condemnatus fuit Philotas, unus ex præ-
cipuis Regis Alexandri amicis, in cuius quæstionis
atque sententiæ moralitatem ex instituti tenore nunc
paucis inquiremus. Et primo quidem considerandum
est,

est, qualis fuerit Phitotæ vita & animi character. Erat igitur magni illius Herois Parmenionis filius, indulgenter nimis a Patre educatus, cui sicut secunda fortuna constanter faverat, ita honorum fascine captus, sibi ipsi plus satis tribuit. In cunctis splendidius fese geslit, quam ut ceteri talem pompam & arrogantium æquis ferre possent animis, quorum proinde invidiam in se concitatavit. Vedit hoc prudens ipse Parmenio, quamobrem filio fastidioso subinde dixisse fertur: Mi fili, modestius te gere, seu ut Græce hæc sonant: ὡ πτᾶ, χείρων μοι γένε. Impedire tamen salubri adeo consilio non potuit, quin Philotas, sui securus, de aliis liberius quam par erat, loqueretur. Sic differens aliquando cum Antigona femina, cuius amore flagrabat, in hæc erumpit verba: *Quid, quæfo, fuisset Philippus sine Parmenione, aut quid esset Alexander sine Philota. Novus hicce Deus, adjutus licet a Jove Hammoniæ, parum valebit, si pater ē ego nos illi opponamus* (a). Hos & alios ejusdem generis causticos sales, ad Regem Alexandrum detulerant adulatores, ut bilem hujus commoverent; sed quum Philotas probe sciret genio Regis sive fese accommodare, sua præsentia omnes livoris nebulas statim dissipavit. Quare Alexander capitalem deinceps actionem contra Philotam instituens, ne verbo quidem memorat, quid de licentiosis ejus verbis & factis jam pridem ab aliis cognoverat. Ex quibus patet, inculpatam minime fuisse vitam Philotæ, qui tamen leviores vitiorum

* * 14 *

maculas abstersit studio, quo Regi suo fuit devotissimus, & alias aliasque voluptatum ac delectationum materias ipsi jugiter procuravit.

(a) Vid. *Plutarcham in Vita Alexandri*, p. 109, 110 & seq.
ed. Lips. 1776.

§. VII.

Porro erit dispiciendum: An verisimile sit, Philotam vel auctorem vel saltem aliis fuisse socium infidiarum, quae in Regem parabantur? Neutrum profecto tuto adfirmari potest. In rebus enim facti standum omnino erit eorum testimonio, qui rem vel gerendam vel gestam probe noscere supponuntur; Enim vero nemo eorum, qui participes intentati parricidii fuerunt, nominavit Philotam ut socium, nedum ut auctorem conspirationis. Nec sibi quisquam persuadet, Cebalinum iterata vice aperuisse Philotæ, quæ a fratre Nicomacho cognoverat, si vel subodorari potuisse, ipsum ex conjuratorum numero fuisse. Dicat forte quispiam, Philotæ nomen fuisse prætermissum, quod hujus potentiam & apud Regem auctoritatem omnes extimescerent. Ita quidem esse potuit in initio actionis, sed quum paullo post & in principio quæstionis, de Philota habendæ, singuli eomperirent, Ducem hunc prius condemnatum a Rege, quam accusatum fuisse, metus oppressionis aberat, adeoque parricidæ ipsum una secum ruina involvere non dubitascent, si modo salva conscientia potuisent, probe gnari,

rem Regi gratissimam ita facturos. Præterea si Philotas aditum sibi ad imperium Macedoniæ, spreta Alexandri orbitate, hisce insidiis parare voluisset, id quod ipsi ab Augusto accusatore objiciebatur, procul dubio jam e longinquo vel sua humanitate vel largis muneribus præcipuos ducum ac militum sibi reddere obstrictissimos tentasset, quin & in anticipitem fortunæ casum se se composuisset, quorum tamen utrumque adeo neglexit, ut ad Regis exemplum in diem viveret, suas magis voluptates, quam populi auram curans. His accedit, quod Philotas, si parricidium peractum concupivisset, tam Cebalinum, qui idem detegere studebat, quam Regem ipsum protinus e medio fustulisset, præfertim quum opportuna satis occasio utrumque ambitioni suæ immolandi non defuisset: vel si isthoc nimis durum ipsi fuisset visum, fuga ad Patrem e vestigio directa, saluti suæ consuluisset. Sed hos a fontibus communiter receptos modos, vitæ pericula & promeritas poenas effugiendi, adspernatus, quieti ac somno se de- dit, tam sua conscientia, quam Regis dextra securus. Ex singulis itaque circumstantiarum momentis, vel in summam computatis, verisimilis nulla emergit suspicio, quod Philotas vel auctor vel socius insidiarum, quæ Regi parabantur, fuerit.

§. VIII.

Non tamen ab omni culpa liberandus est Philotas, quod insidias, quæ strui audiverat, & quarum indicem habe-

habebat Cebalinum, Regi non detexera: quamvis Cebalinus hoc ipsum iterata vice rogasset, & præsentissimum adesse periculum, monstrasset. Nam qui reticet factum, quod ex officii tenore manifestaret, non immrito præsumitur, scelus istud approbare; ac proinde tanto graviorem promeretur poenam, quanto atrocius censetur delictum, quod quidem rescivit, attamen sive ex animi levitate sive ex malitia reticuit. In proposito autem casu periclitabatur vita ipsius Regis Alexandri, qua, velut cardine, salus omnium Macedonum immo ipsius Philotæ vertebatur, adeoque silentium ejus gravissimo delicto erit æquiparandum. Minuitur tamen quodammodo apud æquos rerum æstimatores atrocis hujus facti culpa, quod Philotas, dum alios similes rumores Regi pridem **ex officio** detulisset, cum ludibrio & qui nugas tantummodo narraret, repudiatus fuisset, ideoque etiam in præsenti casu potius contemserit indicium, quam ipsum celaverit. Non tamen omnem a se removet culpam Philotas, dum urget, leviorem sibi visum indicii auctorem, jurgia inter amatorem & exuletum narrantem, quam ut fidem illi haberet: non enim Philotæ conveniebat, auctoritatem indicis ponderare, sed Regi, ad quem, quæ compererat, deferre debuit; nam levibus saepe momentis summa verti constat, & vel unius insidiis patere Regem. Esto, quod Rex Alexander cachinno iterum exceperat hoc indicium; attamen Philotas eodem detecto satisfecisset officiis tam boni civis quam amici, atque se ipsum ab omni suspicionis culpa

in

in isto rerum articulo liberasset. Sed veritus scilicet Philotas, ne, si falsa aut probatu difficultia narrasset, reus ageretur, quasi qui innoxios cives suæ potius ambitioni, quam Regis securitati immolare cuperet, quæ quidem excusatio ingeniosa magis est, quam valida. Potuisset enim Philotas, impetrata prius Regis venia, ad ipsum introducere Cebalinum, ut coram illo plene exponeret, quid a fratre Nicomacho accepisset, de cetero tam indicem hunc, quam conspirationis socios suæ fortunæ & Alexandri arbitrio relinquens. Sicuti itaque Philotas ne se ipsum quidem a culpa silentii intempestivi immunem agnovit, ita magnanimitati Regis conveniebat, veteri amico, veritatem statim fasso & criminis condonationem suppliciter petenti, socordiam hac occasione generose remittere; præsertim quum nullius sceleris esset convictus, & ne quidem ex merito suspectus.

§. IX.

Ita nobiscum, ut speramus, opinabuntur quotquot humanitatis & amicitiae jura migrare, sibi religioni ducunt: ita etjam judicandum esse censuit in initio ipse Alexander, aperte profesus, contemptum magis, quam celatum indicium sibi videri: ideoque supplici Philotæ in pignus reconciliatæ gratiæ dextram porrexit. Paucis autem horis interjectis idem Alexander, adfectuum turbine in transversum actus, in causa amici minime ut Regem magnanimum sese gesit. Nullo enim æquitatis fuso incrustari potest factum, quod Philota a cœna

na dimisso atque inscio, consiliuni quorundam amicorum clam convocaret, quorum tantum non omnes internecino prorsus odio Ducem hunc prosequabantur, eorum sententiam de Philotae factō postulans: qui singuli in eo elaborabant, non ut facinoris objecti gravitatem ex circumstantiarum momentis ponderarent, sed potius ut quamlibet rimam in gratiam cum Rege redundi penitus obstruerent. Facile hoc impetrarunt a Rege, qui sibi ferociter proposuerat, amicum etjam innoxium contra fidem nuperrime datam opprimere. Nulla igitur habita pristinæ dignitatis ratione, Philotam, manibus post tergum religatis, obsoleto amiculo vix tectum, in concionem exercitus protrahi jussit. Et licet Philotas coram exercitu sic verba fecisset, ut accusationis momenta dilueret, suamque in objecto sibi conspirationis consortio ostenderet innocentiam, eo tamen ventum est, ut equuleo imponeretur, quæstionique de ipso habendæ Rex præficeret acerrimos in Parmenionis familiam inimicos, qui Virum nobilissimum ultimis, quos humana excogitare potuit ferocitas, cruciatus, igne, ferro & verberibus, jam non ad quæstionem, sed ad poenam, dilaniare fecerunt; ita ut intumescente ulceribus corpore flagellorum ieiūs nudis osibus incuterentur, fatigatis denique tortoribus, ipsi quoque, qui quæstioni præerant, hastis os oculosque rei everberarent. Stupere omnino mihi videtur non solum humitas, sed ipsa etjam feritas ad exquisitum adeo supplicium.

§. X.

Quicquid sit, dicat adhuc forte quispiam, a tru-
culenta isthac scena discedens: attamen Philotas ad po-
stremum ex sua confessione una cum Patre Parmenio-
ne fuit condemnatus. Dic autem, fodes, qualis hæ-
fuerit? Profecto non spontanea, non argumentis elici-
ta probabilibus, sed mechanicis instrumentis extorta.
Ad summum enim gradum processerant cruciatum
genera, antequam quidquam dixit reus. Victus tan-
dem dolorum magnitudine petiit, ut aliquantis per ces-
farent cruciatus, quo spiritum colligeret, & aliquid
deinceps proferret. Remotis igitur tortoribus, quid
dicere debeat, ignorare se in isto corporis & animi
deliquio fuit professus: Dic igitur, inquit Cratero ini-
mico suo, quid me velis dicere. Arcesitis rursus tor-
toribus, narrationem quandam exorsus est, vel ideo
quam maxime suspectam, quod ab homine mortuo,
qui interrogari non poterat, tota rei series repeteretur,
de parricidii autem crimine, quod ei objiciebatur, con-
stanter negat, donec tandem novis, eisdemque ultimis
eruciatis, ut idem quoque confiteatur, adigitur. A-
gnoscit quidem postridie, quæ in tormentis antea dixe-
rat, sed postquam ei vivendi nec spes, nec causa, nec
cupo amplius esset relicta. Enimvero hoc modo &
in tali articulo aliquid confiteri, reapse nihil est aliud,
quam diffiteri. Bene enim Cicero (a): *Tormenta gu-
bernata dolor, moderatur natura cujusque tam animi quam
corporis: regit quæstor, fletit libido, corrumpit spes,*
infir-

infirmat metus, ut in tot rerum angustiis nihil veritati loci relinquatur. Quare etjam quæstiones, per equuleum habendæ, sicut ab humanitate remotæ, ita ab optimis Europæ Principibus, qui generis nostri deliciæ merito audiunt, haud ita pridem fuerunt abrogatæ, qui etjam sibi dictum putant, quod Tragicus in Octavio adfert (b):

*Pulchrum eminere est inter illustres Viros,
Consulere Patriæ, parcere afflictis, fera
Cœde abstinere, tempus atque iræ dare,
Orbi quietem, seculo pacem suo,
Hæc summa virtus, petitur hac cælum via.*

(a) in *Orat, pro Sulla, Cap. 28.*

(b) Vid. *Seneca in Octavio.*

S. D. G.

